

Reperensiya Para sa Workbook sa Tigom nga Kinabuhi ug Ministeryo

MAYO 1-7

BAHANDI GIKAN SA PULONG SA DIYOS | 2 CRONICAS 17-19

“Lantawa ang Uban Sama sa Panglantaw ni Jehova”

w17.03 24 ¶7

Palandongang mga Butang nga Nasulat

⁷ Komosta ang anak ni Asa nga si Jehosapat? Daghan siyag maayong hiyas. Kay misalig si Jehosapat sa Diyos, nakahimo siyag daghang maayong butang. Bisan pa niana, nakahimo sab siyag dili maalamong mga desisyon. Pananglitan, gipaminyo niya ang iyang anak sa anak ni Ahab nga daotang hari sa amiha-nang gingharian. Ug bisan pa sa pasidaan ni propetang Micaias, si Jehosapat nakig-uban kang Ahab sa pagpakiggubat batok sa mga Siryanhon. Sa panggubatan, si Jehosapat hapit mamatay. Dayon mibalik siya sa Jerusalem. (2 Cron. 18:1-32) Niana, si propetang Jehu nangutana kaniya: “Ngadto ba sa daotan nga ihatag ang tabang, ug ngadto ba sa mga nagadumot kang Jehova nga ikaw magbaton ug gugma?”—**Basaha ang 2 Cronicas 19:1-3.**

w15 8/15 11-12 ¶8-9

Palandongang mga Way Paglubad nga Gugma ni Jehova

⁸ Gusto ni Jehova nga atong mahibaloan nga siya nahigugma kanato. Siya naglantaw sa atong maayong mga hiyas, dili sa atong pagkadili-hingpit. (2 Cron. 16:9) Pananglitan, gibuhat niya kana kang Haring Jehosapat sa Juda. Sa usa ka higayon, si Jehosapat nakahimo ug sayop nga desisyon pinaagi sa pagduyog kang Haring Ahab sa Israel sa pagpakiggubat sa mga Siryanhon aron mabawi ang Ramot-gilead. Bisag 400 ka mini nga manalagna ang nagpa-

salig sa daotang si Ahab nga siya modaog, ang matuod nga manalagna ni Jehova nga si Micaias nagtagna ug seguradong kapildihan. Si Ahab namatay sa panggubatan, ug si Jehosapat hapit mamatay. Pagbalik ni Jehosapat sa Jerusalem, gibadlong siya tungod sa iyang pagpakig-alyansa kang Ahab. Bisan pa niana, si Jehu, nga anak ni Hanani nga bisyonaryo, mii-ngon kang Jehosapat: “Adunay maayong mga butang nga nakaplagan diha kanimo.”—2 Cron. 18:4, 5, 18-22, 33, 34; 19:1-3.

⁹ Sa bag-o pa siyang naghari, gisugo ni Jehosapat ang mga prinsipe, Levihanon, ug mga saserdote nga moadto sa tanang siyudad sa Juda aron tudloan ang katawhan sa Balaod ni Jehova. Malamposon kaayo kadto mao nga ang mga tawo sa palibot nga kanasoran nahadlok kang Jehova. (2 Cron. 17:3-10) Oo, si Jehosapat nakahimog sayop nga desisyon, apan wala malimot si Jehova sa maayong mga butang nga iyang nahimo. Kini nga asoy magpahinumdom kanato nga bisan pa sa atong pagkadili-hingpit, dili molubad ang gugma ni Jehova kanato kon kita maningkamot sa pagpahimuot kaniya.

Espirituwal nga mga Bahandi

w17.03 20 ¶10-11

Alagara si Jehova Uban sa Bug-os nga Kasingkasing!

¹⁰ Ang anak ni Asa nga si Jehosapat “nagpadayon paglakaw diha sa dalan sa iyang amahan nga si Asa.” (2 Cron. 20:31, 32) Sa unsang paa-gi? Sama sa iyang amahan, giawhag ni Jehosapat ang mga tawo sa pagpangita kang Jehova. Gibuhat niya kana pinaagi sa pag-organisar ug buluhatong pagpanudlo nga naggamit sa “basahon sa balaod ni Jehova.” (2 Cron. 17:7-10) Miadto pa gani siya sa teritoryo sa amihanang

gingharian sa Israel, ngadto sa kabukiran sa Ephraim, “aron iyang madalag balik sila kang Jehova.” (2 Cron. 19:4) Si Jehosapat maoy usa ka hari nga “nangita kang Jehova uban sa bug-os niyang kasingkasing.”—2 Cron. 22:9.

¹¹ Kitang tanan mahimong makig-ambit sa dakong buluhatong pagpanudlo nga gisugo ni Jehova karon. Imo bang tumong kada bulan nga itudlo ang Pulong sa Diyos ngadto sa uban, nga palihokon ang ilang kasingkasing sa pag-alagad sa Diyos? Pinaagi sa imong paningkamot ug sa tabang ni Jehova, mahimong makakaplag kag Bible study. Usa ba kana sa mga tumong nga imong giampo? Andam ka bang mobuhat niini, bisan tingalig maibanan ang imong libreng panahon? Ug maingon nga si Jehosapat miadto sa teritoryo sa Ephraim aron tabangan ang mga tawo nga mahibalik sa matuod nga pagsimba, matabangan sab nato ang mga dili aktibo. Dugang pa, hikayon sa mga ansiyano nga maduaw ug matabangan ang mga napalagpot nga sakop sa teritoryo sa kongregasyon nga tingali mibiya na sa ilang pagpakasala.

MAYO 8-14

BAHANDI GIKAN SA PULONG SA DIYOS | 2 CRONICAS 20-21

“Pagbaton ug Pagtuo Kang Jehova nga Inyong Diyos”

w14 12/15 23 ¶8

Pag-atubang sa Kataposan Niining Daan nga Kalibotan nga Magkauban

⁸ Sa adlaw ni Haring Jehosapat, ang katawhan sa Diyos gisulong sa “usa ka dakong panon sa katawhan” gikan sa palibot nga mga dapit. (2 Cron. 20:1, 2) Maayo kay ang mga alagad sa Diyos wala mosalig sa ilang kaugalingong kusog sa pagbuntog niining gamhanang kaaway.

Hinunoa, sila misalig kang Jehova. (**Basaha ang 2 Cronicas 20:3, 4.**) Wala sila mag-iyaiyag pangita ug solusyon, hinunoa sila nagkahiusa. Ang Bibliya nag-ingon: “Ang tanan nga iya sa Juda nagtindog atubangan kang Jehova, bisan ang ilang kabataan, ang ilang mga asawa ug ang ilang mga anak.” (2 Cron. 20:13) Bata man o tigulang, sila misalig kang Jehova ug naningkamot sa pagsunod sa iyang sugo. Ug gipanalipdan sila ni Jehova batok sa ilang mga kaaway. (2 Cron. 20:20-27) Dili ba usa kini ka maayong panig-ingnan kon unsaon nato pag-atubang ang mga hagit ingong katawhan sa Diyos?

w21.11 16 ¶7

Mga Magtiayon nga Bag-ong Minyo—Himoang Prayoridad ang Pag-alagad Kang Jehova

⁷ Si Jehova nakig-estorya kang Jehosapat pinaagi sa Levisanan nga si Jahaziel. Si Jehova miingon: “Pahimutang mo, pabiling nagbarog, ug tan-awa ang kaluwasan nga ihatag ni Jehova kaninyo.” (2 Cron. 20:13-17) Dili gyod na ang kasagarang paagi sa pagpakiggubat! Pero kadto nga instruksiyon dili gikan sa tawo; gikan to kang Jehova. Uban ang bug-os nga pagsalig sa iyang Diyos, gihimo ni Jehosapat ang gisugo kaniya. Dihang siya ug ang katawhan migula aron makiggubat sa mga kaaway, iyang gibutang sa atubangan, dili ang banggiitan nga mga manggugubat, kondili ang walay armas nga mga mag-aawit. Gituman ni Jehova ang iyang saad kang Jehosapat; iyang gipildi ang mga kaaway.—2 Cron. 20:18-23.

Espirituwal nga mga Bahandi

it-1 1198 ¶1-2

Jehoram

Labing menos sa usa ka paagi tungod sa datang impluwensiya sa iyang asawa nga si Atalia, si Jehoram wala magpadayon sa pag-

subay sa matarong nga mga dalan sa iyang amahan nga si Jehosapat. (2Ha 8:18) Dili lamang gibuno ni Jehoram ang iyang unom ka igsoon ug ang pipila ka prinsipe sa Juda kondili iyang gipaliso usab ang iyang mga sakop gikan kang Jehova ngadto sa bakak nga mga diyos. (2Cr 21:1-6, 11-14) Ang tibuok niyang paghari nahugawan sa panagbangi sa sulod ug sa gawas. Una, ang Edom mirebelde; dayon ang Libna mialsa batok sa Juda. (2Ha 8:20-22) Diha sa usa ka surat ngadto kang Jehoram, ang manalagna nga si Elias nagpasidaan: “Tan-awa! Ipadapat ni Jehova ang dakong hampak nganha sa imong katawhan ug sa imong mga anak ug sa imong mga asawa ug sa tanan mong mga manggad.” Dugang pa, ikaw, Haring Jehoram, “takboyan ug daghang sakit, uban ang usa ka balatian sa imong mga tinai, hangtod nga ang imong mga tinai molugwa tungod sa sakit sa adlaw-adlaw.”—2Cr 21:12-15.

Ang tanan nahitabo gayod nga ingon niana. Gitugotan ni Jehova nga sakopon sa mga Arabo ug mga Filistehanon ang yuta ug bihagon ang mga asawa ni Jehoram ug ang iyang mga anak nga lalaki. Ang kamanghoran lamang nga anak nga lalaki ni Jehoram nga si Jehoahaz (gitawag usab nga Ahazias) ang gitugotan sa Diyos nga makaikyas, hinuon, gitugot lamang kini tungod sa gihimong pakigsaad sa Gingharian uban kang David. “Human niining tanan si Jehova naghampak [kang Jehoram] diha sa iyang mga tinai sa usa ka sakit nga walay pagkaayo.” Duha ka tuig sa ulahi “ang iyang mga tinai milugwa” ug sa kataposan siya namatay. Busa natapos ang kinabuhi niining daotang tawo, kinsa “mitaliwan nga wala kawilihi.” Siya gilubong sa Siyudad ni David, “apan dili sa mga lubnganan sa mga hari.” Si Ahazias nga iyang anak nga lalaki nahimong hari puli kaniya.—2Cr 21:7, 16-20; 22:1; 1Cr 3:10, 11.

MAYO 15-21

BAHANDI GIKAN SA PULONG SA DIYOS | 2 CRONICAS 22-24

“Gantihan ni Jehova ang mga Buhat sa Pagkamaisogon”

w09 4/1 24 ¶1-2

Si Jehoas Mibiya Kang Jehova Tungod sa Datang mga Kauban

USA kadto ka makalilisang nga panahon sa Jerusalem, ang siyudad diin nahimutang ang templo sa Diyos. Bag-o pa lang gyong gipapatay ni Atalia ang iyang anak nga si Haring Ahazias. Walay makatuo sa sunod nga gihimo ni Atalia. Iyang gipapatay ang mga anak nga lalaki ni Ahazias, nga iyang kaugalingong mga apo! Nahibalo ka ba kon ngano?—Aron siya na ang magmando imbes nga usa kanila.

Apan, ang usa sa mga apo ni Atalia, ang batang si Jehoas, naluwas. Wala mahibalo niini ang iyang lola. Gusto ka bang mahibalo kon sa unsang paagi naluwas ang bata?—Buweno, ang bata adunay iyaan nga ginganlag Jehoseba, nga maoy nagtago kang Jehoas ngadto sa templo sa Diyos. Nahimo niya kini tungod kay ang iyang bana nga si Jehoiada usa man ka Hataas nga Saserdote. Busa ilang giseguro nga matagoan nga luwas si Jehoas.

w09 4/1 24 ¶3-5

Si Jehoas Mibiya Kang Jehova Tungod sa Datang mga Kauban

Si Jehoas gitagoan sa templo sulod sa unom ka tuig. Siya gitudloan didto bahin kang Jehova nga Diyos ug sa iyang mga balaod. Sa kataposan, sa dihang si Jehoas nagpangedaron nag siyete anyos, si Jehoiada mihimog lakang aron himoong hari si Jehoas. Gusto ka bang mahibalo kon giunsa kini paghimo ni Jehoiada ug kon unsay nahitabo sa lola ni Jehoas, ang datan nga si Rayna Atalia?—

Sekreto nga gipatawag ni Jehoiada ang mga pangulo sa mga guwardiya sa mga hari kaniadto sa Jerusalem. Iya silang gisultihan kon sa unsang paagi siya ug ang iyang asawa nagluwas sa anak nga lalaki ni Haring Ahazias. Dayon gidala ni Jehoiada si Jehoas ngadto sa maong mga guwardiya, ug sila kombinsido nga siya ang may katungod nga magmando. Ug sila mihimog usa ka plano.

Gipresentar ni Jehoiada si Jehoas sa mga tawo ug gikoronahan siya. Ang mga tawo ‘namakpak ug miingon: “Mabuhi ang hari!”’ Gilibotan sa mga guwardiya si Jehoas aron maproteksiyonan siya. Sa dihang nadunggan ni Atalia kining maong pagmaya, siya midagan paingon didto ug misinggit ug panagkunsabo. Apan pinaagi sa mando ni Jehoiada, si Atalia gipatay sa mga guwardiya.—2 Hari 11:1-16.

it-2 201 ¶5

Lubnganan, Paglubong

Ang matarong nga Hataas nga Saserdoteng si Jehoiada gipasidunggan pinaagi sa paglubong kaniya didto “sa Siyudad ni David uban sa mga hari,” ang bugtong tawo nga dili sakop sa harianong linya nga gihisgotang nakadawat sa maong pasidungog.—2Cr 24:15, 16.

Espirituwal nga mga Bahandi

it-2 1406 ¶17

Zacarias

12. Anak nga lalaki sa Hataas nga Saserdoteng si Jehoiada. Human mamatay si Jehoiada, si Haring Jehoas mitalikod sa matuod nga pagsimba, namati sa sayop nga tambag inay sa mga manalagna ni Jehova. Si Zacarias, nga igagaw ni Jehoas (2Cr 22:11), hugot nga nagpasidaan sa katawhan bahin niini, apan inay nga maghinulsol, sila nagbato kaniya didto sa sawang sa templo. Ang mga pulong ni Zacarias sa dihang hapit nang mamatay mao: “Si Jehova magatan-aw unta niini ug magasingil niini.”

Gidungog sa Diyos kining matagnaon nga hangyo, kay dili lamang ang Sirya nakahimog dakong kadaot sa Juda kondili si Jehoas gipatay usab sa duha sa iyang mga alagad “tungod sa dugo sa mga anak ni Jehoiada nga saserdote.” Ang Gregong *Septuagint* ug ang Latin nga *Vulgate* nag-ingon nga si Jehoas gipatay aron mapanimaslan ang dugo sa “anak” ni Jehoiada. Apan, ang Masoretikong teksto ug ang Syriac nga *Peshitta* mabasa nga “mga anak,” lagmit naggamit ug plural aron ipaila ang pagkahalangdon ug pagkahamili sa anak ni Jehoiada nga si Zacarias, ang manalagna ug saserdote.—2Cr 24:17-22, 25.

MAYO 22-28

BAHANDI GIKAN SA PULONG SA DIYOS | 2 CRONICAS 25-27

“Si Jehova Makahatag Kanimog ug mas Daghan pa kay Niana”

it-1 1193 ¶1

Jehoas

Gipasuholan usab ni Jehoas sa hari sa Juda ang usa ka gatos ka libo sa iyang tropa aron makig-away batok sa mga Edomhanon. Hinunoo, tungod sa tambag sa usa ka “tawo sa matuod nga Diyos” sila gipapauli, ug bisan pag sila gibayran nag usa ka gatos ka talanton nga plata (\$660,600), sila nangasuko sa dihang gipapauli, lagmit tungod sa pagkawala sa gilaoman nilang bahin sa mga agawonon. Busa human sa ilang pagbalik sa A ilang giagawan ang mga lungsod sa habagatang gingharian, gikan sa Samaria (lagmit ang sukaranan sa ilang kalihokan) hangtod sa Bet-horon.—2Cr 25:6-10, 13.

w21.08 30 ¶16

“Tilawi” ang Pagkamaayo ni Jehova—Sa Unsang Paagi?

¹⁶ **Paghimog mga sakripisyo para kang Jehova.** Dili nato kinahanglang biyaan ang tanang

butang nga atong gikalipayan aron mapahimut-an si Jehova. (Eccl. 5:19, 20) Apan, kon magduhaduha ta sa paghimog dugang pa sa pag-alagad sa Diyos aron lang makalikay sa mga sakripisyo, basin mahimo nato ang sayop sa tawo diha sa ilustrasyon ni Jesus kinsa naghago aron makabaton ug daghang butang pero wala magpakabana sa Diyos. **(Basaha ang Lucas 12:16-21.)** Ang brader nga si Christian, kinsa nagpuyo sa France, miingon, “Wala nako mahatag kang Jehova ug sa akong pamilya ang kinamaayohan sa akong panahon ug kusog.” Siya ug ang iyang asawa midesisyon nga magpayunir. Pero aron makab-ot ang maong tumong, kinahanglan silang mobiya sa ilang mga trabaho. Aron masuportahan ang ilang kaugalingon, nagsugod silag gamayng negosyo sa pagpanghinlo, ug nakat-onan nila nga magmakontento sa gamay nilang kita. Unsay resulta sa ilang sakripisyo? Si Christian miingon, “Mas nag-enjoy na mi sa among ministeryo karon ug nalipay ming makita ang among mga Bible study ug balikduaw nga nakakat-on bahin kang Jehova.”

Espirituwal nga mga Bahandi

w07 12/15 10 ¶1-2

Aduna Ka bay Espirituwal nga Magtutudlo?

SA EDAD nga 16, si Uzzias nahimong hari sa habagatang gingharian sa Juda. Siya nagmando ug kapin sa 50 ka tuig, sukad sa 829 hangtod sa 778 W.K.P. Sukad sa pagkabata, si Uzzias “nagpadayon pagbuhat kon unsay matarong sa mga mata ni Jehova.” Unsay nakaimpluwensiya kaniya sa pagsunod sa matarong nga dalan? Ang asoy sa kasaysayan nag-ingon: “[Si Uzzias] padayong nakiling sa pagpangita sa Diyos sa mga adlaw ni Zacarias, ang magtutudlo diha sa pagkahadlok sa matuod nga Diyos; ug, sa mga adlaw sa iyang pagpangita

kang Jehova, ang matuod nga Diyos naghimo kaniyang mauswagón.”—2 Cronicas 26:1, 4, 5.

Gawas niining asoya sa Bibliya, wala nay laining impormasyon nga naghisingot bahin kang Zacarias, ang magtatambag sa hari. Hinuon, ingong “ang magtutudlo diha sa pagkahadlok sa matuod nga Diyos,” si Zacarias adunay maayo kaayong impluwensiya sa batan-ong hari sa pagbuhat kon unsay matarong. Ang *The Expositor’s Bible* nag-ingon nga si Zacarias dayag nga “usa ka tawong sinati sa Kasulatan, daghag kasinatian bahin sa relihiyon, ug may katagos sa pagpaambit sa iyang kahibalo.” Usa ka eskolar sa Bibliya nakahinapos bahin kang Zacarias: “Sinati kaayo siya sa tagna ug . . . utokan, debotado, maayong tawo; ug, lagmit, adunay dakong impluwensiya kang Uzzias.”

MAYO 29–HUNYO 4

BAHANDI GIKAN SA PULONG SA DIYOS | 2 CRONICAS 28-29

“Makaalagad Ka Kang Jehova Bisag Dili Maayo ang Ehemplo sa Imong Ginikanan”

w16.02 14 ¶18

Sundoga ang Suod nga mga Higala ni Jehova

⁸ Dili sama kang Ruth, ang batan-ong si Ezequias natawo sa usa ka nasod nga napahinungod kang Jehova. Apan dili tanang Israelinhon ang nagtuman sa ilang pahinungod. Ang amahan ni Ezequias nga si Haring Ahaz maoy usa ka pananglitan niana. Ang maong daotang tawo maoy nanguna sa gingharian sa Juda sa paghimog idolatriya, nga nagpasipala pa gani sa templo ni Jehova sa Jerusalem. Lisod handurawon ang kahimtang ni Ezequias sa bata pa, kay ang pipila niya ka igsoong lalaki nakasinatig mangilngig nga kamatayon, nga gisunog nga buhi ingong halad ngadto sa bakak nga diyos! —2 Hari 16:2-4, 10-17; 2 Cron. 28:1-3.

w16.02 15 ¶9-11

Sundoga ang Suod nga mga Higala ni Jehova

⁹ Si Ezequias puwede untang masuko o mayugot sa Diyos. Ang uban nga dili kaayo ingon niana ang naangiang kalisod naghunahuna nga may katarongan silang ‘maaligutgot kang Jehova’ o mayugot sa iyang organisasyon. (Prov. 19:3) Ug ang pipila mibati nga tungod sa ilang dili maayong kagikan, lagmit mahimo silang daotan o masundog nila ang kasaypanan sa ilang ginikanan. (Ezeq. 18:2, 3) Husto ba ang maong panghunahuna?

¹⁰ Ang kinabuhi ni Ezequias nagpamatuod nga sayop gayod kana. Wala gayoy maayong katarongan nga mayugot kang Jehova, kay dili siya ang hinungdan sa kadaot nga nahitabo sa mga tawo niining daotang kalibotan. (Job 34:10) Tinuod, ang mga ginikanan makaimpluwensiya sa ilang mga anak sa paghimog maayo o daotan. (Prov. 22:6; Col. 3:21) Apan wala kini magpasabot nga ang kagikan sa usa maoy magtino kon unsay iyang kinabuhi inigkadako niya. Sa kasukwahi, si Jehova naghatag kanatong tanan ug bililhong gasa—ang katakos nga mopili kon unsay atong buhaton ug kon mahimong unsa kita inigkahamtong na. (Deut. 30:19) Giunsa paggamit ni Ezequias ang maong gasa?

¹¹ Bisag si Ezequias anak sa usa sa labing daotang mga hari sa Juda, siya nahimong usa sa kinamaayohang mga hari. (**Basaha ang 2 Hari 18:5, 6.**) Oo, ang iyang amahan daotag impluwensiya, apan dihay lain nga puwedeng makaimpluwensiya kaniya. Si Isaias nag-alagad ingong manalagna niadtong panahona, maingon man si Miqueas ug Oseas. Atong mahanduraw si Haring Ezequias nga namati pag-ayo sa inspiradong mensahe sa maong matinumanong mga tawo, nga nagtisok diha sa iyang kasingkasing sa tambag ug pagtul-id ni Jehova. Busa gitul-id ni Ezequias ang daotang

mga buhat nga gihimo sa iyang amahan. Gibuhat niya kini pinaagi sa paghinlo sa templo, paghangyo sa Diyos nga pasayloon ang sala sa katawhan, ug pagwagtang sa paganong mga idolo sa tibuok Juda. (2 Cron. 29:1-11, 18-24; 31:1) Dihang nag-atubang siyag lisod nga mga kahimtang, sama sa hulga nga atakehon ang Jerusalem sa Asiryanhong hari nga si Senakerib, si Ezequias nagpakitag dakong kaisog ug pagtuo. Siya misalig nga luwason sila sa Diyos ug iyang gipalig-on ang mga tawo pinaagi sa pulong ug buhat. (2 Cron. 32:7, 8) Sa ulahi, dihang kinahanglang tul-iron si Ezequias kay siya nagmapahitas-on, siya nagpaubos ug naghinulsol. (2 Cron. 32:24-26) Klaro nga wala tugoti ni Ezequias nga ang iyang kaagi magdaot sa iyang presenteng kinabuhi o maghikaw kaniya sa iyang kaugmaon. Hinunoa, gipakita niya nga siya higala ni Jehova ug usa ka maayong ehemplo kanato.

Espirituwal nga mga Bahandi

w12 2/15 24 ¶6-25 ¶1

Natan—Maunongong Tigpaluyo sa Putling Pagsimba

Ingong matinumanong magsisimba ni Jehova, maikagong gipaluyohan ni Natan ang plano ni David sa pagtukod sa unang templo alang sa putling pagsimba. Apan nianang higayona, gipadayag ni Natan ang iyang kaugalingong opinyon imbes maghulat kon unsay isulti ni Jehova. Nianang gabhiona, gisugo sa Diyos ang propeta sa paghatod ug lahing mensahe sa hari: Dili si David ang magtukod sa templo ni Jehova kondili usa sa iyang mga anak. Apan gipahibalo ni Natan nga ang Diyos maghimog usa ka pakigsaad kang David aron ang iyang trono “matukod nga malig-on hangtod sa panahong walay tino.”—2 Sam. 7:4-16.

Ang opinyon ni Natan bahin sa pagtukod sa templo wala mahiuyon sa kabubut-on sa Diyos.

Apan ang mapainubsanong propeta wala magbagulbol. Siya mipahiuyon sa katuyoan ni Jehova ug mikooperar niini. Pagkamaayong panig-ingnan alang kanato kon tul-iron kita ni Jehova! Ang iyang mga nahimo sa ulahi ingong propeta nagpakita nga giuyonan gihapon siya ni Jehova. Gani mopatim-aw nga giinspirar ni Jehova si Natan ug si Gad nga bisyonaryo sa pagsugo kang David sa pag-organisar ug 4,000 ka musikero alang sa pag-alagad sa templo.—1 Cron. 23:1-5; 2 Cron. 29:25.

HUNYO 5-11

BAHANDI GIKAN SA PULONG SA DIYOS | 2 CRONICAS 30-31

“Ang Pagtambong sa mga Panagkatigom Makaayo Nato”

it-1 771 ¶2

Ezequias

Ang Iyang Kasibot Alang sa Matuod nga Pagsimba. Gipasundayag gilayon ni Ezequias ang iyang kasibot alang sa pagsimba kang Jehova sa dihang milingkod siya sa trono sa panuigong 25 anyos. Ang una niyang gibuhat mao ang pagbukas pag-usab ug ang pag-ayo sa templo. Unya, gitigom ang mga saserdote ug mga Levihanon, siya miingon kanila: “Duol sa akong kasingkasing ang paghimo ug usa ka pakigsaad kang Jehova nga Diyos sa Israel.” Usa kini ka pakigsaad sa pagkamatinumanon, nga matorag ang pakigsaad sa Balaod, nga padayong gipatuman apan wala tagda, giinagurahan pag-usab sa Juda. Uban sa dakong kahago iyang giorganisar ang mga Levihanon sa ilang mga buluhaton, ug iyang giorganisar pag-usab ang mga kahikayan sa tulonggon ug sa mga awit sa pagdayeg. Kadto maoy Nisan, ang bulan nga pagasaulogon ang Paskuwa, apan mahugaw ang templo ug ang mga saserdote ug ang mga Levihanon. Sa ika-16 nga adlaw sa Nisan,

ang templo gihinloan ug ang mga galamiton niini gipasig-uli. Unya ang usa ka linaing pagtabon-sa-sala kinahanglang himoon sa tibuok Israel. Una, ang mga prinsipal nagdalag mga halad, mga halad-sa-sala alang sa gingharian, sa sangtuwaryo, ug sa katawhan, nga gisundan sa linibo ka halad-nga-sinunog gikan sa katawhan.—2Cr 29:1-36.

it-1 771 ¶3

Ezequias

Sanglit ang kahugawan sa katawhan maoy napugong sa ilang pagsaulog sa Paskuwa sa naandang panahon, gipadapat ni Ezequias ang balaod nga nagtugot niadtong mahugaw sa pagsaulog sa Paskuwa usa ka bulan sa ulahi. Iyang gipatawag dili lamang ang Juda kondili ang Israel usab pinaagi sa mga sulat nga gipadala sa mga magdadagan sa tibuok yuta gikan sa Beer-seba hangtod sa Dan. Ang mga magdadagan giyubit sa kadaghanan; apan may mga indibiduwal, ilabina gikan sa Aser, Manases, ug Zabulon, nga mapainubsanong miadto, ug mitambong usab ang pipila nga gikan sa Ephraim ug Isacar. Gawas pa niini, didto usab ang daghang dili-Israelinhon nga mga magsimba ni Jehova. Lagmit usa gayod ka dakong hagit ang pagtambong alang niadtong sakop sa amihanang gingharian kinsa mibarog dapig sa matuod nga pagsimba. Sila, sama sa mga mensahero, makaagom ug mga pagsupak ug pagbiaybiay, sanglit ang napulo-ka-tribong gingharian naglunang sa kadunotan, naunlod sa bakak nga pagsimba ug gihasi sa mga Asiryanhon.—2Cr 30:1-20; Num 9:10-13.

it-1 771 ¶4-5

Ezequias

Human sa Paskuwa, ang Pista sa mga Tinapay nga Walay Igpatatubo gisaulog sulod sa pito ka adlaw uban ang kalipay nga tungod ni-ana ang tibuok kongregasyon nakahukom sa

pagpalugway niini ug pito pa ka adlaw. Bisan pa sa maong peligrosong mga panahon mipatigbabaw ang panalangin ni Jehova mao nga “dihay dakong pagmaya sa Jerusalem, kay sukad sa mga adlaw ni Solomon nga anak ni David nga hari sa Israel walay sama niini sa Jerusalem.”—2Cr 30:21-27.

Makita sa mosunod nga kini maoy usa ka tinuod nga pagpasig-uli ug pagbuhi pag-usab sa matuod nga pagsimba ug dili lamang usa ka lumalabayng emosyonal nga panagkatigom. Sa wala pa sila mopauli sa ilaha, ang mga nagsaulog nanggula ug ilang gidugmok ang sagradong mga haligi, gitumpag ang hatag-as nga mga dapit ug ang mga halaran, ug gipamutol ang sagradong mga poste sa tibuok Juda ug Benjamin ug bisan sa Epraim ug Manases. (2Cr 31:1) Gipakita ni Ezequias ang panig-ingnan pinaagi sa paggupok sa halas nga tumbaga nga gihimo ni Moises, tungod kay ang katawhan naghimo niini nga usa ka idolo, ug naghimog gipaaso nga halad alang niini. (2Ha 18:4) Human sa dakong pista, gitino ni Ezequias nga magpadayon ang matuod nga pagsimba pinaagi sa pag-organisar sa mga dibisyon sa mga saserdote ug sa paghikay nga masuportahan ang mga buluhaton sa templo; siya nagpahimangno sa pagsunod sa Balaod labot sa mga ikapulo ug sa pag-amot sa unang mga bunga ngadto sa mga Levihanon ug sa mga saserdote, nga niini bug-os kasingkasing nga misanong ang katawhan.—2Cr 31:2-12.

Espirituwal nga mga Bahandi

w18.09 6 ¶14-15

Malipayon Mo kon Inyo Ning Buhaton

¹⁴ Ang laing paagi nga mapakita nato ang pagkamapainubsanon mao ang pagkaandam maminaw. Ang Santiago 1:19 nag-ingon nga kinahanglan tang “magmaabtik sa pagpaminaw.” Si Jehova mismo ang pinakamaayong ehem-

plo ana. (Gen. 18:32; Jos. 10:14) Konsideraha ang atong makat-onan sa **Exodo 32:11-14. (Basaha.)** Bisag wala kinahanglana ni Jehova ang opinyon ni Moises, gihatagan gihapon niya kinig kahigayonan sa pagsulti sa gibati niini. Mapailobon ka bang maminaw sa tawong masalaypon ug dayon sundon ang iyang giingon? Hinunoa, si Jehova mapailobong maminaw sa mga tawong nag-ampo niya nga may pagtuo.

¹⁵ Maayong pangutan-on nato ang kaugalingon: ‘Kon si Jehova mapainubsanong maminaw sa mga tawo sama sa iyang gihimo kang Abraham, Raquel, Moises, Josue, Manoa, Elias, ug Ezequias, di ba angay pod nakong tahoron ang mga igsoon, dayegon sila, paminawon ang ilang opinyon, ug sundon pa gani ang ilang maayong mga ideya? May kakongregasyon ba ko o membro sa pamilya nga nagkinahanglan karon sa akong atensiyon? Unsay kinahanglan nakong himoon bahin ana?’—Gen. 30:6; Maghu. 13:9; 1 Hari 17:22; 2 Cron. 30:20.

HUNYO 12-18

BAHANDI GIKAN SA PULONG SA DIYOS | 2 CRONICAS 32-33

“Palig-ona ang mga Igsoon Panahon sa Kalisdanan”

it-1 224 ¶7

Asirya

Senakerib. Si Senakerib, ang anak nga lalaki ni Sargon II, miatake sa gingharian sa Juda panahon sa ika-14 nga tuig ni Ezequias (732 W.K.P.). (2Ha 18:13; Isa 36:1) Si Ezequias mirebelde batok sa gisangon nga yugo sa Asirya ingong resulta sa gibuhat sa iyang amahan nga si Ahaz. (2Ha 18:7) Si Senakerib misanong pinaagi sa pagpangdaog sa tibuok Juda, nga gitahong nagsakop sa 46 ka siyudad (itandi ang Isa 36: 1, 2), ug dayon, gikan sa iyang kampo sa La-

kis, siya nangayo kang Ezequias ug tributo nga 30 ka talanton nga bulawan (mga \$11,560,000) ug 300 ka talanton nga plata (mga \$1,982,000). (2Ha 18:14-16; 2Cr 32:1; itandi ang Isa 8: 5-8.) Bisan pa ug nabayran kini nga kantidad, si Senakerib nagpasugo sa iyang mga tigpamaba aron pasurenderon sa bug-os ang Jerusalem. (2Ha 18:17-19:34; 2Cr 32:2-20) Ang misunod nga paglaglag ni Jehova sa 185,000 sa kasundalohan ni Senakerib sa usa lamang ka gabii nakapugos sa nanghambog nga Asiryanhon sa pagsibog ug sa pagbalik ngadto sa Nineve. (2Ha 19:35, 36) Sa ulahi siya gipatay didto sa iyang duha ka anak nga lalaki ug gipulihan sa trono sa iyang laing anak nga lalaki, si Esar-hadon. (2Ha 19:37; 2Cr 32:21, 22; Isa 37:36-38) Kini nga mga panghitabo, gawas sa paglaglag sa Asiryanhong kasundalohan, gitala usab diha sa prisma ni Senakerib ug sa prisma ni Esar-hadon.—MGA HULAGWAY, Tomo 1, p. 957.

w13 11/15 19 ¶12

Pito ka Magbalantay, Walo ka Duke—Kon Unsay Kahulogan Alang Kanato Karon

¹² Kon dili nato masulbad ang usa ka problema, si Jehova andam kanunay sa pagtabang kanato. Apan iyang gidahom nga buhaton nato ang atong maaranan. Gikonsulta ni Ezequias ‘ang iyang mga prinsiphe ug ang iyang gamhanang mga tawo,’ ug sila midesisyon “sa pagtak-op sa mga tubig sa mga tubod nga didto sa gawas sa siyudad . . . Dugang pa, [si Ezequias] nagmaisogon ug nagtukod sa tanang nalumpag nga paril ug nagpatindog ug mga torre sa ibabaw niana, ug sa gawas lain nga paril, . . . ug naghimog daghang udyong ug mga taming.” (2 Cron. 32:3-5) Aron mapanalipdan ug maati-man ang iyang katawhan nianang panahona, gigamit ni Jehova ang daghang maisog nga tawo—si Ezequias, iyang mga prinsiphe, ug ang matinumanong mga propeta.

w13 11/15 19 ¶13

Pito ka Magbalantay, Walo ka Duke—Kon Unsay Kahulogan Alang Kanato Karon

¹³ Ang sunod nga gihimo ni Ezequias mas importante kay sa pagtak-op sa mga tubig ug sa pagpalig-on sa mga paril sa siyudad. Kay maayong magbalantay, gitigom ni Ezequias ang katawhan ug gidasig sila: “Ayaw kahadlok ni malisang tungod sa hari sa Asirya . . . kay adunay mas daghan nga uban kanato kay nianang uban kaniya. Uban kaniya anaa ang usa ka bukton nga unod, apan uban kanato anaa si Jehova nga atong Diyos aron sa pagtabang kanato ug sa pagpakig-away sa atong mga gubat.” Pagkamakapalig-on sa pagtuo nga pahinumdom—si Jehova makig-away alang sa iyang katawhan! Pagkadungog niini, ang mga Hudiyo “misalig sa mga pulong ni Ezequias nga hari sa Juda.” Matikdi nga ang “mga pulong ni Ezequias” maoy nakadasig sa katawhan nga mosalig sa Diyos ug magmaisogon. Busa si Ezequias, iyang mga prinsiphe ug gamhanang mga tawo, maingon man si propetang Miqueas ug Isaías maoy maayong mga magbalantay, sama sa gitagna ni Jehova pinaagi sa iyang propeta.—2 Cron. 32:7, 8; *basaha ang Miqueas 5:5, 6.*

Espirituwal nga mga Bahandi

w21.10 4-5 ¶11-12

Unsa ang Tinuod nga Paghinulsol?

¹¹ Ngadtongadto, gitubag ni Jehova ang mga pag-ampo ni Manases. Nakita niya ang mga kausaban sa kasingkasing ni Manases, nga nadayag diha sa iyang mga pag-ampo. Natandog si Jehova sa pagpakiluoy ni Manases ug gipasig-uli siya sa pagkahari. Gipahimuslan ni Manases ang maong kahigayonan aron ipakita nga tinuod siyang naghinulsol. Gihimo niya ang wala gyod himoa ni Ahab. Siya nagbag-o. Naningkamot siya nga wad-on ang bakak nga

pagsimba, ug gidasig niya ang mga tawo nga simbahon si Jehova. (**Basaha ang 2 Cronicas 33:15, 16.**) Nagkinahanglan gyod tog kaisog ug pagtuo, kay sulod sa daghang katuigan, si Manases dili maayog impluwensiya sa iyang pamilya, sa halangdong mga tawo sa iyang palasyo, ug sa iyang katawhan. Pero karon nga tigulang na siya, naningkamot si Manases nga tul-iron ang pipila sa dili maayong mga butang nga iyang nahimo. Posible nga maayo siyang impluwensiya sa bata pa niyang apo nga si Josias, kinsa sa ulahi nahimong maayo kaayong hari.—2 Hari 22:1, 2.

¹² Unsang leksiyon ang atong makat-onan kang Manases? Siya nagpaubos, pero dili kay kana ray iyang gihimo. Nag-ampo sab siya ug nagpakiluoy. Ug nagbag-o siya. Naningkamot siya sa pagtul-id sa kadaot nga iyang gipahinabo, ug gihimo niya ang iyang maaraman sa pagsimba kang Jehova ug sa pagtabang sa uban nga buhaton sab kana. Ang pananglitan ni Manases naghatag ug paglaom bisan niadtong nakahimog grabe kaayong mga sala. Ang iyang kasinatian nagpamatuod nga si Jehova nga Diyos “maayo ug andam sa pagpasaylo.” (Sal. 86:5) Pasayloon ni Jehova kadtong tinuod nga naghinulsol.

HUNYO 19-25

BAHANDI GIKAN SA PULONG SA DIYOS | 2 CRONICAS 34-36

“Bug-os ba Kang Nakabenepisyo sa Pulong sa Diyos?”

it-1 1091 ¶15

Hulda

Sa dihang nadungog ni Josias ang mga pulong sa “basahon sa balaod” nga nakaplagan ni Hilcias nga hataas nga saserdote sa panahon sa pag-ayo sa templo, siya nagpadalag mga

delegado aron sa pagpakisayod kang Jehova. Sila miadto kang Hulda, kinsa sa baylo, nagpadangat sa pulong ni Jehova, nga nagpakita nga ang tanang katalagman nga gitala diha sa “basahon” modangat sa apostatang nasod gumikan sa pagkadili-masinugtanon. Si Hulda midugang nga si Josias, tungod kay nagpaubos sa iyang kaugalingon atubangan kang Jehova, dili makakita sa katalagman apan pagatigomon ngadto sa iyang mga katigulangan ug pagdad-on ngadto sa iyang lubnganan diha sa kalinaw.—2Ha 22:8-20; 2Cr 34:14-28.

w09 6/15 10 ¶120

Magmasiboton Alang sa Balay ni Jehova!

²⁰ Panahon sa pag-ayo sa templo nga gihikay ni Haring Josias, si Hilcias nga hataas nga saserdote ‘nakakaplag sa basahon sa balaod ni Jehova nga gihatag pinaagi sa kamot ni Moises.’ Gihatag niya kana kang Sapan nga sekretaryo sa hari kinsa, sa baylo, nagbasa sa unod niini ngadto kang Josias. (**Basaha ang 2 Cronicas 34:14-18.**) Unsa may epekto niana? Dihadiha, gigisi sa hari ang iyang besti tungod sa kasubo ug gisugo ang iyang mga sinaligan nga magpakisayod kang Jehova. Pinaagi sa manalagnang si Hulda, ang Diyos naghatag ug mensahe nga nagkondenar sa pipila ka relihiyosong mga tumanon nga gihimo diha sa Juda. Bisan pa niana, namatikdan sa Diyos ang paningkamot ni Josias sa pagwagtang sa idolatrosong mga buhat, ug siya padayong gipaboran ni Jehova bisan pa sa mga kalamidad nga gitagnang mahitabo sa tibuok nasod. (2 Cron. 34:19-28) Unsay atong makat-onan niini? Tino nga ang atong tinguha susama nianang kang Josias. Gusto natong mosunod dayon sa mga instruksiyon ni Jehova ug palandongon kon unsay mahitabo kon atong tugotan ang apostasya ug pagkadili-matinumanon nga mobalda sa atong pagsimba. Ug makasalig kita nga makita usab ni Jehova ug uyonan ang atong kasibot

alang sa matuod nga pagsimba, sama sa iyang gibuhay sa kahimtang ni Josias.

Espirituwal nga mga Bahandi

w17.03 27 ¶15-17

Palandonga ang mga Butang nga Nasulat

¹⁵ Sa kataposan, unsang pasidaan ang atong makaplagan sa nahitabo sa maayong hari nga si Josias? Matikdi kon unsay nakaingon sa iyang kapildihan ug kamatayon. **(Basaha ang 2 Cronicas 35:20-22.)** Si Josias “migula sa pagpakigsangka” kang Haring Neko sa Ehipto, bisan pag dili kini gustong makiggubat kang Josias. Ang Bibliya nag-ingon nga “gikan sa baba sa Diyos” ang mga pulong ni Neko. Nan, nganong nakiggubat man si Josias kang Neko? Walay gihisgotan ang Bibliya.

¹⁶ Hinunua, sa unsang paagi mahibal-an ni Josias nga gikan kang Jehova ang giingon ni Neko? Aw, puwede siyang mangutana kang Jeremias, usa sa matinumang mga propeta. (2 Cron. 35:23, 25) Apan walay rekord nga gibuhay niya kana. Dugang pa, si Neko nagpadulong sa Carkemis aron makiggubat “batok sa laing balay,” dili sa Jerusalem. Lain pa, wala malangkit ang ngalan sa Diyos, kay wala man tamaya ni Neko si Jehova o ang Iyang katawhan. Busa sayop gayod ang desisyon ni Josias nga makiggubat kang Neko. Duna ba kitay makat-onang leksiyon nga atong mapadapat? Dihang mag-atubag problema, maayong konsiderahon nato kon unsay kabubut-on ni Jehova maylabot niana.

¹⁷ Kon motungha ang problema, angay natong susihon kon unsang mga prinsipyo sa Bibliya ang nalangkit ug ipadapat kana sa balanseng paagi. Sa pipila ka kahimtang, maayong konsultahon nato ang mga ansiyano. Tingali napalandong na nato ang atong nahibaloan bahin niana, ug naka-research na ta sa atong mga

publikasyon. Apan, duna tingaliy ubang prinsipyo sa Bibliya nga angayng konsiderahon, ug matabangan ta sa ansiyano sa pag-analisar niana. Pananglitan, ang usa ka sister nahibalo nga responsabilidad niya ang pagsangyaw sa maayong balita. (Buh. 4:20) Bisan pa niana, ibutang ta nga nagplano siyang mosangyaw sa usa ka espesipikong adlaw, pero gusto sa iyang dili magtutuong bana nga magpabilin siya sa balay. Miingon ang bana nga taudtaod na silang wala mag-date, ug gusto niyang manuroy sila. Lagmit konsiderahon sa sister ang pipila ka teksto sa Bibliya, sama sa pagsunod sa Diyos ug paghimog tinun-an. (Mat. 28:19, 20; Buh. 5:29) Apan kinahanglan sab niyang tagdon ang iyang pagpasakop ingong asawa ug ang pagkamakataronganon. (Efe. 5:22-24; Filip. 4:5) Dili ba gyod siya pasangyawon sa iyang bana, o mihangyo lang kini nga manuroy sila nianang adlaw? Kinahanglan tang magmabalanse samtang buhaton nato ang kabubut-on sa Diyos ug maningkamot sa pagbaton ug maayong konsensiya.

HUNYO 26–HULYO 2

BAHANDI GIKAN SA PULONG SA DIYOS | ESDRAS 1-3

“Tugoti si Jehova sa Paggamit Kanimu”

w22.03 14 ¶1

Nakita ba Nimo ang Nakita ni Zacarias?

ANG mga Hudiyo eksayted kaayo. ‘Gipalihok ni Jehova ang kasingkasing ni Haring Ciro sa Persia’ nga hatagag kagawasan ang mga Israelinhon nga nabihag sa Babilonya sa daghan nang katuigan. Ang hari mihimog proklamasyon nga ang mga Hudiyo puwede nang mobalik sa ilang lugar ug ‘tukoron nila pag-usab ang balay ni Jehova nga Diyos sa Israel.’ (Esd. 1: 1, 3) Makapalipay gyod kaayo na! Nagpasabot

nâ nga ang mga Hudiyo makasimba pag-usab sa matuod nga Diyos sa yuta nga iyang gihtag kanila.

w17.10 26 ¶2

Ang mga Karo ug ang Korona Manalipod Kanimo

² Si Zacarias nahibalo nga may pagtuo ang mga Hudiyo nga namalik sa Jerusalem. Sila kad-tong “kansang espiritu gipalihok sa matuod nga Diyos” aron biyaan ang ilang pinuy-anan ug negosyo sa Babilonya. (Esd. 1:2, 3, 5) Ilang gibiyaan ang yuta nga pamilyar kaayo nila aron mobalhin sa dapit nga wala pa makita sa kadaghanan nila. Kon dili pa importante ang pagtukod pag-usab sa templo, dili unta sila mobiyaheg 1,600 kilometros latas sa peligro-song dapit.

Espirituwal nga mga Bahandi

w06 1/15 19 ¶1

Mga Haylayt Gikan sa Basahon ni Esdras

1:3-6. Sama sa pipila ka Israelinhon nga nag-pabilin sa Babilonya, daghang Saksi ni Jehova dili makaalagad ingong bug-os-panahong mga ministro o dili makaalagad diin adunay mas dakong panginahanglan. Bisan pa niana, sila nagpaluyo ug nagdasig gihapon niadtong makahimo ug naghatag ug boluntaryong mga amot sa pagpauswag sa buluhatong pagsang-yaw sa Gingharian ug paghimog tinun-an.